

Gobierno lo busca asistencia tecnico di Hulanda pa bin cu programa nobo di servicio pa ancianonan



ORANJESTAD(AAN) -- Ministro di Bienestar General Fredis Refunjol den su discurso na ocasion di spantenbier di renovacion di e anteriormente San Pedro Hospital, a bisa cu e ta hopi satisfecho di mira con rapido e promer fase di e proyecto menciona a ser construi.

El a felicita Karel Arends y e trahadornan di Arends Construcccion, kendenan a haci un tremendo labor.

Ministro Refunjol a sigui bisa cu Gobierno ta trahando conscientemente pa mehora e trato cu nos grandinan ta haya. El a duna di conoce cu dia 13 di Maart ultimo Consejo di Ministro a tuma

e decision ariba un rapport cual a ser presenta door di un comision interdepartamental di cual tambe a forma parti dirigentenan di Saba y ABV pa conhuntamente trece un solucion pa e problemanan cu tabata ataca e servicio pa nos grandinan.

Refunjol a menciona tres parti hopi importante di e decision cu a ser tuma pa Consejo di Ministro ariba 13 di Maart 1991.

Uno ta cu semper tabata tin problema cu e salario, e subsidio di e personal. Gobierno a logra pa separa e subsidio di personal for di e subsidio di "exploitatie".

Esaki ta encera cu aumento considerable pa mayoria di e trahadornan den e sector aki.

Ademas tin un rapport cu lo ser traha door di DOW pa renova y drecha e partinan cu ta necesario na e diferente sitionan. Segun Refunjol, durante añanan largo tabata tin cierto negligencia pa mantencion di e respectivo edificionan.

Lo pone esaki den un programa completo y a base di fase lo bay reconstrui y renova e partinan cu ta necesario.

Referiendo na e plan di renovacion di San Pedro Hospital, el a bisa cu Gobierno a dicidi

di solicita Hulanda pa ayudo tecnico pa programa tanto e planan nobo como tambe e

servicionan cu lo mester bay duna pa asina e servicio pa nos grandinan ta optimal.